

Timotire Quraŋ 2

Polji Timotire Quraŋ ruame 2

fukeya.

Mimitaniŋ

Polji igokoine eru jeŋoŋ ogo babapiine Timotire “Gema uŋsowoŋ buŋone tatariine otebe-min,” miku Biŋe Quraŋ yo quraŋgaya. Buŋo buruine qoruine oi oroinere yamenyamen. Polji oi mitaniŋgaru maŋine kitiŋgaku uŋsowoŋine inŋi oteru quraŋgaya: Timoti goji damaŋ so dimaku Yesu Kristore fuŋne kitiŋgaku miku goigoŋ. Bobiaŋ Biŋe eru Jojofu Buru Raŋgbaine manege, oi qakatoru ore buŋoine foriine yobu oi ŋiŋigo qaji yareru maŋbapakare gio baeigoŋ. Kiso eru garebi joiserereŋ fuŋne fuŋne bofukeru manenoŋ ine, jibu Anutuji gio gareya ore so oi yameŋ keku baeigoŋ.

Polji siŋaŋ bobo buŋo sanaŋine Timoti inŋi oteya: Goineji “qaqouma paiineo kekepari omaine eru kajeboji eegobi” goji ore buŋoo roperu damaŋgo bojigojibugaru egu sibirigaiŋ. Kekepari buŋo oŋuine oiji ŋiŋigo so yobu bapi yabeegobiyon, ŋiŋigo kaje ruaru maneegobi oi bosembe yabeko sibiriganimin.

Polji uŋsowoŋ buŋoine sosowo kitiŋ gaingo ore injoyonere gogore binaŋ quraŋgaya. Wamore uruŋu gio buruine ruaru jigo qaku goya, Timotiji ore buŋoine egu niga gainŋ ore oi inŋi mitaniŋgaya, “Nonji Yesu manesiŋ garu yobiŋ

maneku kariyeru manjijojoko eru gobon. Keke-suesue enarebi joisereren maneru yamen keku sanangaru dimabon.”

Buk yoore mobe qoruine 5 oi inji:

Buᅇo funfunᅇaine 1.1-2

Anutu miteᅇ gaku Timoti unᅇsowon oteya 1.3-2.13

Kajeᅇouᅇ eru siᅇaᅇ bobo buᅇo goine 2.14-4.5

Pol poreru qoimo etebi goya 4.6-18

Qurande buᅇo koruᅇ qoruine 4.19-22

¹ Anutu maᅇ aᅇiineji mitigaru Pol nonᅇ igodon nuko Kristo Yesure aposol fukego. Kristo Yesuke qakatoru dimabeneᅇ gogo sananeᅇ noreiᅇ ore buᅇoine kipeya ore Biᅇe buᅇoine mitaneᅇgabemiᅇ ore sore nuᅇe gogo.

² Timoti goji mamesinde yoro madene fukege. Nonji goke buᅇo mimane enimi ore quraᅇ yo quraᅇgago.

Mamanonᅇuᅇ Anutu eru Ofonᅇnonᅇuᅇ Kristo Yesu, yokoji ᅇonemaᅇ yaunᅇmoriri garebire womoo goigoᅇ.*

Polji Timoti maᅇine kitingaku buᅇo miya.

³ Nonde apa ᅇasopuneji Anutu kiᅇaᅇ qateku gobi nonji jikigaru gioine babe Anutuji “ᅇone gube sagaga,” najime maᅇkajeneo onᅇ maneeᅇo. Maᅇne gbagbataeᅇine fukeko Anutu miteᅇ gaego. Miteᅇ garu una ubu onᅇa wosiru go jijiki manesu gueᅇo. ⁴ Boke gube kuyomeᅇ jiᅇo obugo wakiya, nonji oi manesuku ᅇone gubemiᅇ ore aᅇine sogo maneru yamen keego. ᅇone guru aᅇibaᅇi ᅇebire jeribariji maᅇne puseiᅇgo ore manego.

* 1:2: Apo 16.1

⁵ Goji kikoine tomiri fofori Yesu manesiŋ garu goge, buŋo oi maŋ yoroneo peko manesuego. Rone abugo Lois eru maŋgogo Yunis yokoji maŋyakuj kerisiebire mamanesiŋyakunji fukeya. Yokore ŋadiyakunjo goji oŋuakon eru goge, oi manesiŋ sanaŋgago.*

⁶ Ore eru nomeniga egu gomiŋ ore buŋo ini kegboreru gajigo: Nonji rone mene qorugoo ru-aru oŋga wosibe Anutuji gio bobore mamane yaun gareko maŋgoo pega, oi bogborende jo boruŋ oŋuine sanaŋgaru jaku so eleleŋ eiŋ.

⁷ Buŋo yo manesuigoŋ: Anutuji Moro Tiri-ine oi ruruine ruaru sombuŋoŋuŋ manekimiŋ ore matayoŋ, iŋoyoŋunde usunde Moro noreko soine maŋnoŋuŋji jojoko naduŋgaduj eku ee-bobonoŋuŋ poretiŋ sisiŋaŋ eeku dimainebeneŋ.

⁸ Ore eru Ofonŋoŋunde buŋo kitiŋgaku mis-aeiŋgo etaŋqataŋ so eiŋoŋ. Oŋu matayoŋ, noŋ oŋuine fukeru goigoŋ. Nonji Ofonde gio baku gok-abe ore eru witi pigo ruabi ŋegoyoŋ, jibu nonde eru mimi so maneru goigoŋ. Go sanaŋgaru noŋ oŋuine koimo dimaku mande gio baku goigoŋ. Bobiaŋ Biŋere eru igosisi egarenobuŋ ine, ore joiserereŋ maneku kariere osigaru goigoŋ. Anutuji usuŋ gareega ore so oi soine noke moko yameŋ keku osigaru gonimi.

⁹ Anutuji ronere ronekoŋgo Sombuŋ moreŋ so bofuke yaperu damaŋ oo noŋunde manesuku buru iŋi ruaya: Anutuji Kristo Yesure eru yaunmoriri noreiŋ. Buru oi ruame peko go waperu gobi noŋuŋ fukebeneŋ. Fukebeneŋ

* 1:5: Apo 16.1

Anutuji nonon biñe fukeru gbagbataenine gokimin ore onga noreru munan qa noreya. Nononone ya fiine baben ore eru so roosoe noberu onga noreyayon, inoyonunde buru ranbanine oi boyoberu dimaku oo onga noreya. ¹⁰ Buru ranbanine ore foriine oi daman yoo totogo fukeya. Munanqoqo Raunonunji fukeru Anutire yaunmoriri kese noreya. Kristo Yesuji fukeru komere usun qaku bawakiru rakame Bobian Biñeine bararinga noreko tamaeya. Biñe buño oi manesiñ garu soine gogo sananine bofukeru tatariine tomiri sananaru goku daman mogo so kome sananine so komekimin.

¹¹ Anutuji non Bobian Biñe mitaninaru ninigo qaji yarebemin ore igodon nuko sosore ni aposol fukego.* ¹² Aposol fukego ore eru gioine sananaru babe goineji igosisi narebi joisereren maneego. Sombun Ni manesiñ gaego, nonji inore fune fiine akon mane mukugo. Ore eru koimo dimaku mimi so maneego. Mata yobu! Anutuji manesiñ nuru Biñe gioine noreya ore so non sinan nuin ore sananaru goga, oi mane mukugo. Onu mane mukube gioineji so jibugaru wakiko go roperu daman yasogoo ropekimin. Onu manesiñ garu ore eru manoyoka so ego. ¹³ Mamanesinde buño oi mannonon bobiangain ore so fukega, nonji buño foriine oi qaji gareru mosi fiine gaduru gobon. Oi man kiningoo ruaru onuakon boyoberu goigon. Niño Kristo Yesuke qakatoru moko dimabenen manjoko enoreega, goji manjoko ore manineo goigon.

* **1:11:** 1 Tim 2.7

¹⁴ Anutuji ɲone guru manesiɲ guru ya fiine sosowo gareko biɲego fukega, oiji egu bokende jibugaiɲ ore oi siɲaɲ garu goigoɲ. Moro Tiriineji maɲnoɲuɲgo goga ɲore usuɲ paiineo ya foriine oi poretiɲ siɲaɲ gande peine.

¹⁵ Eisia prowinsre muraɲpune yoɲoji sosowo boke nuru ɲadi nubi, oi manege. ɲi tinayakuɲ Figelus eru Hermogenes yokoji yoɲore botugo gogobire. ¹⁶ Goineji boke nubunyoɲ, Onesiforus ɲoji mata. Ore eru Ofoɲ, go Onesiforusre garikiɲpu ɲonemaɲ eyarende gonimiɲ. ɲi oiji nonde gbedinere (nigiɲ) mimi so enaregayoɲ, damaɲ kokoine oo beufi enareko maɲne waigo eya. ¹⁷ Onesiforusji Rom sitio yoo waperu damaɲ oo akoɲ nonde yameɲ keku baaru goku bofuke nuya. ¹⁸ ɲoji rone Efesus sitio uruɲu babapi yasogo kokoine eru baku afaga nuru goya, oi gogake soine mane mukuge. Ore eru damaɲ yasogoo Ofoɲ goyoɲineo ropebeneɲ Onesiforusji ɲonemaɲde furi bofukeiɲ ore oɲga wosigo. Oɲu.

2

Kristo Yesure eru jigo qaku goigoɲ.

¹ O maɲkekerisie madene Timoti, go Kristo Yesuke qakatoru yaunmoriri maɲgo qɲ keru sanaɲgaru dimaigoɲ. ² Nonji Biɲe buɲo qaji garebe kokoineji ɲone nuru kitiɲgaku mibi manende, oi ɲiɲigo manesiɲ yabenimiɲ ore so fukegobi, yoɲore biɲe eiɲ ore yareigoɲ. Oɲu yarende peko soine ɲiɲigo goine jikigaru qaji yarenimiɲ ore so fukeinebi.

³ O Timoti, go Kristo Yesuke dimaku injore mamari ni kuririgoke fukeru yamenj keku sananjaru jigo qaku goigonj. Igosisi egareniminj, ore joisererenjine maneru karieru osigaru goigonj.

⁴ Mamari njire kamasiine oi inji: Mamari sinanj qoruyanunji ni oga yabeko mamari kubure buruo roperu ra wareru gio damanj so baku gogobi, yonjoji sosowo sinanyanunji mitigaega ore so renjaru eniminj ore jaueru dimagobi. Onu dimaku yonoyanunde gogore kikitinj ore ya mo so baku gogobi. Manji roroinj so gogobi.

⁵ Ore soso buño mo oi inji: Masiri njiji sisirio roperu mimiti sinanjnere buño odureru kosa giningaru raga, injoji kuririineke so fukeinj. Injore qoruineo gbinj eere hendinj mo so ketebi rakainj. Ore eru go poretinj akonj raigonj. ⁶ Onuakonj sasari njiji gio yasogo bame foriine fukeko bonieru raru mine baku noko sagainj. Goineji wiriebuñ, yonjoji injore njadio wareniminj. Go ore so sananjaru gio baku goigonj. ⁷ Buño quranjago, oi osegaru maneru yobinjande Ofonji manjboronj gareko oi sosowo soine mane taniñgaigonj. Ore eru oi manj kiningoo ruaru manesuku goigonj.

⁸ Yesu Kristo manesuku goigonj. Nonji Bobianj Biñe mitaniñgaego, Yesuji buño ore so kinj Deiwid osigidaine fukeru Munanjgoqo Rauine fukeko Anutuji bogboreme komegone pakereya.

⁹ Nonji Bobianj Biñe buño oi yamenj keku mitaniñjaru igosisire joisererenjine manebe suronjgoqo ni onjuine niginji kipe nubi njego. Onu njegoyonj, Anuture Biñe buño oi so niginjaru kipebuñ. ¹⁰ Funjine ore eru nonji joisererenj

sosowo maneru kariyeru sananḡaru dimago. Anutuji nḡnigo inoyonunde roosoe yabeya, nonji yonore eru yamenḡ keku jigo qaku gogo. Kristo Yesuji munanḡ qa yareko yonoji onuakonḡ qowirieru senḡinḡbanḡinḡ fukeniminḡ ore manego. Manyanḡunḡ kerisieru goniminḡ ine, Sombunde kuririquaranḡo roperu tatariine tomiri sananḡaru go ropeniminḡ. ¹¹ Buḡo yo sananḡ qanḡqanḡine fukega:

“Nonḡunḡ maḡnonḡunḡ ranḡgbaineji inoke moko komeko gogobenenḡ ine, onuakonḡ inoke sananḡaru gokiminḡ.

¹² Inoke moko joisererenḡ maneru kariyeru gogobenenḡ ine, onuakonḡ inore qorumanḡ maḡngo inoke siḡanḡyayabe gio bakiminḡ.

Nonḡunḡ ino mugagobenenḡ ine, inoji onuakonḡ muga noberu ḡone noberu takigainḡ.*

¹³ Nonḡunḡ ḡadi gatebenenḡ geoine bokirie noreinḡo ore buḡo kipeme pega, inoji oi kepieinḡo ore embimbḡinḡainḡ.

Mitinḡbotinḡ eru inoyonunde fuḡne qopieinḡo ore mosobofukeega.

Ore eru etanḡqatanḡ eru buḡononḡunḡ gbenḡ akonḡ so boyobekiminḡ ine, inoji jibu (poretinḡ di-maku) buḡoine damanḡ so boyoberu ore so enoreinḡ.” Onḡu.

Anuture Biḡe giore ḡiine inḡi fukeru goigonḡ:

¹⁴ O Timoti, buḡo yo egu niga guinḡ ore oi mi gboreru eyareru Anuture jinḡo maio inḡi mitiga yareru goigonḡ: Mamanesinde buḡo maru fuḡne fuḡne oi babokiriru gbedigaru so osoeru

* **2:12:** Mat 10.33; Luk 12.9

dimainebi. Mikoboboji so yobu bapi nobeegayoŋ, goineji noigoi buŋo oŋuine maneru bobojibu fukebuŋ mamananiŋaŋunji jibugame egu sibiriganimiŋ. ¹⁵ Goji Biŋe giore baesoi fuŋne fuŋne oi gbiŋ ruande Anutuji ŋone guru “Sagage,” miŋ ore yameŋ keku dimaigoŋ. Go Kristore giore mimigo so maneru goigoŋyoŋ, Biŋe buŋo foriine poretiŋ boroiŋgaru manyaŋuŋ bapakare yaberu goigoŋ.

¹⁶ Morende buŋo mitomi omaine omaine oi bio yoberu ŋadi gaigoŋ. Goineji oi misaueku goku oŋuine oo morende aŋgiŋineo qakatoru Anutu jikigaru qaqauma eru witijibu eegobi.

¹⁷ Wi sanaŋine (tinaine kensa) oiji saki fuyaŋuŋ siriineke qaku kime sogueru raega, yoŋoji ore so buŋo omaine miku oiji ŋiŋigo bosembea yareegobi. Yoŋore kubuone ŋi yoyoka tinayakuŋ Himeneus eru Filetus gogobire. ¹⁸ Yokoji buŋo foriinere fuŋne bokeru tiŋtuŋ qaku buŋo rekaine iŋi miegobire, “Maŋkekerisie ŋiŋigo nonuŋ gboreru pakerreru gogobeneŋ. Ore eru jiki komegone moke so gboreru pakerekimiŋ.” Oŋu miku goine bojiqojibu eyarebire mamananiŋaŋunji sembeaega.

¹⁹ Oŋu sembeaegayoŋ, Anutuji otuŋ sanaŋ qaŋqaŋine ureya oiji jibu so pariru dimaga. Ore mogeine oi iŋi quraŋgabi pega, “Ofonji iŋoyonjere biŋe fukegobi, oi mane muku yabega.” Mogeine mo oi iŋi, “Ŋiŋigo Ofonde tina roru oŋgaegobi, sosowo yoŋoji bio eebobo sembene qa yoberu goinebi.”*

* **2:19:** Jare 16.5

²⁰ Pi soguine oo jua, dero, pere, gomba, qajagu funṅne funṅne pega. Goine yoji eru afe morenji bakine, oi damaṅ so roru gioo ruaegobeneṅ. Goine goul eru silwaji bakine. Kuririyaṅṅke oṅuine oi jeri damaṅineo akonṅ gioo ruaegobeneṅ. ²¹ Ore so moji buṅo omaine bokeru inṅoyonṅ kekeririke eega, inṅoji dero goulji bakine oṅuine fukeinṅ. Rauineji oi roru gio kuririinekeo ruame baeinṅ. Oi bako touṅmoririineke fukeme Soguneineji inṅore jerieeinṅ. Anutuji bagbagbaga gume qembibiineke dimaku gio fiine sosowo baiṅgo jaueru dimainṅ.

²² Jeṅonṅ gogore aṅi sananṅine sembeneji egu siṅaṅ guinṅ ore go siṅaṅ eku goigonṅ. (Giogore foriji egu wakinṅ ore oi migo.) Eesoigo pore guegobi, oi bio use teru ṅadi qaku gogo yo oṅuine goinṅgo yamenṅ keku goigonṅ: Nṅinṅigo maṅ gbagbataenṅinere paio Ofonṅ bapi yabeinṅ ore oṅgaegobi yonṅoke eebobo poretinṅ boyoberu Anutu poretinṅ manesiṅ garu fofori manji jojoko nadunṅgadunṅ eku womoo goinebi.

²³ Goineji kajeboji buṅo mitomi miku noigoi migobobo ebi kekepari fukeega, oi fofori manege. Ore eru oi bio yoberu ṅadi gaku goigonṅ.

²⁴ Ofonde gio bobo ṅi fukega, inṅoji kekepari baiṅ ore so matayonṅ, ṅinṅigo sosowo waigo paiineo eyareku afagaru qaji yareru goigonṅ. Sisiri etebi oi sananṅaru maneku karieru goigonṅ. ²⁵ Goineji kiso etebi oi soine maṅwomo paiineo qodureku botinṅ yabeeigonṅ. Oṅu eyareko Anutuji maṅyaṅuṅ bowiriekeo soine Biṅe buṅo mane mukuru maṅyaṅuṅ kerisienobuṅ. ²⁶ Kiso ṅinṅigo

yoŋoji Sembene Rauinere suba bitiŋgo odetaribi niŋiŋgame miine reŋgaru eegobi. Oŋu eru maŋyaŋuŋ untome maŋ mamesuyanŋuŋ fukeko Sembene Rauinere niŋiŋ gbedione keŋgoroŋgaru wakinobuŋ. Oŋu.

3

Damaŋ tatariineo gogo sembearu wuwunuŋineke fukeiŋ.

¹ Buŋo koruŋ yo mane mukuru goigoŋ: Yesu wawarere damanji bembengako niŋigo fuŋneyaŋuŋji sembeako tatariineo gogo bibiineke ini fukeiŋ: ² Niŋigoji yoŋoyanunde akon manesuku monen ya roku roiŋgo ore ebu (greed) eenimiŋ. Sakiyanuŋ miten gaku qorua oŋuine toyanuŋ qoromureru sigopou goku maŋqoqo buŋo fofoine kosa mienimiŋ. Maŋgo mamapuyanŋuŋ yoŋore mi so reŋgaru ya fiinere danŋe so miku nayaqaya (nomenika) eenimiŋ. Anuture keta eru qaqouma eenimiŋ.

³ “Inoyonunde yobiŋ,” miku beusembe ma-manen so eenimiŋ. Goine yoŋore agiburan so bokeru ore maŋsembeine osigaenimiŋ. Nadiqoqo buŋo kisonŋaru miku yoŋoyone so sisiŋaŋ eku niŋigo poreru qaimo eyareenimiŋ. Eebobo fiinere taki yabeme useenimiŋ.

⁴ Babae baku yoŋoyanunde ani boyoberu qaŋgoqasa qaenimiŋ. Sigopou goku jaubairiŋbirinji maŋyaŋuŋ puteme manjo eenimiŋ. Saki fure ani jeriyaŋuŋ ore ani kokoine maneru Anuture manebi wawakiine fukeme qaŋaŋine oobe ruaenimiŋ. ⁵ Anuture Biŋe gio mobeine

sowo osigaru keoma eru Sonda buru kosa boyoberu gbedigaegobiyon, eeboboyanunji Anuture usun oi kikiranḡaru mugaegobi. Njinigo onuine oi ruge ruaru use teru ḡadi yaberu goigon. ⁶ Yonoreone goineji kosa roregaru njinigo piyanunḡo roperu buḡo jijiji midobodo eyareku kajeyanunḡ qofonḡaegobi. Kajeyanunḡ qofonḡabi nḡo goineji wirieru yonoreo qakatoegobi. Nḡo agiburanyanunde mimire eru waki yabeko anyanunḡ sananine funne funne oiji yoro-ohe eyarebi jijibu egobi, yonoji oi qanḡe seron manera baku qukarieru yabebi bunḡore bitinyanunḡo waki yabeega.

⁷ Nḡo onuine yonoji mane yobinḡaru jijiki buḡo qaji yareniminḡ ore gbedigaru manee-go-biyon, Biḡe buḡo foriinere funne oi daman so mane mukunḡo embimbḡaegobi. ⁸ Ijpt kantrire riubobo ḡi tinayakunḡ Janes eru Jambres yokoji Moses kiso etebu. Njinigo qaqaḡibuine yonoji yokore so Biḡe buḡo foriinere kiso ee-gobi. Njinigo onuine yonore mamaneji jibugame witijibu fukegobi, oi Anutuji mamananyanunḡ baeso bako waki yabeko Ofonḡe didimayanunḡi gbanjinḡ.*

⁹ Daman pomponine sakiyanunḡ ba ropeen-iminḡonḡ, gioyanunde fori oi daman so joroko janḡaru mataeinḡ. Ijpt ḡi yokore funne totogo fukeya, yonore witijibure funneji ore so totogo fukeko njinigo sosowoji oi ḡone mukuniminḡ. Onu.

Polre mimiti buḡo tatariine

* **3:8:** Eks 7.11

¹⁰ Yoŋoreo oŋu fukeiŋyoŋ, nonji gogonere moge furuine igodonŋaru buru ruaboŋ. Niŋigo Biŋe buŋo qaji yareru eebobone eba eku gobon, goji oi ŋoneru mane forege. Gogonere moge boy-oberu mamananesinde kekegbore gio damaŋ so baku joisereren maneku karieru gobon, ore bi-naŋine miku mibi mane sarigage. Maŋkekerisie ogopune maŋneji jojoko eyareru gobon. Kiso eku igosisi enarebi oo yameŋ keku sanaŋaru dimaku gobon. ¹¹ Kekesuesue sisikonkoŋ fuŋne fuŋne enareku gobuŋ, oi manege. Antiokia, Aikoniam eru Listra taon yokaomo oo joisereren nonde paio ropeko koŋkoŋ manebon, oi ya mimiine fukeya. Yei, mamagore sia! Igosisi maneku karieru osigaru gobonyon, Ofonji oi sosowo oone bomuku nuya.*

¹² Buŋo yo maneigon: Niŋigo Kristo Yesuke qakatoru dimaku gogo sanaŋine goku ore kekegbore gio baiŋgo maneegobi, oi sosowoji kekesuesue bofukenimiŋ. Non igosisi enarebuŋ, ine, goine ŋoŋo oŋuakoŋ eŋarenimiŋ. ¹³ Riubobo niŋigo sembene Biŋe gio sasaki baku mumutu qaegobi, yoŋoji jikigaru sembeqambearu gonimiŋ. Yoŋoji niŋigo goine eadu yareru yoŋoyone oŋuakoŋ eadu ee eku gonimiŋ.

¹⁴ Yoŋoji oŋu gonimiŋyon, Timoti go Biŋe buŋo foriine maneru maŋ wombunŋoo ruaru maŋyoka tomiri manesiŋ gage, oo jikigaru qin keru dimaku sanaŋaru goigon. Uri yoŋoji qaji garebuŋ, go yoŋore fuŋne mane mukuge. Oi manesiŋ yabege ore eru Biŋe buŋo gben roru so gbanjiru

* **3:11:** Apo 13.14-52; 14.1-7, 8-20

bokeigoŋ. ¹⁵ Maŋkerisiere Biŋe Quraŋ Tiriine oi gbiegoone akoŋ mane sarigaru go wapemeŋ. Go oi oseru manesunde maŋboronŋo tamaeko ore paiineo dimaku Munanŋoqo Rauinere fuŋne mane taniŋgamiŋ. Oi mane taniŋgaru Kristo Yesu manesiŋ gande munanŋ qa gareko jikigaru qowirieru goigoŋ.

¹⁶ Anutuji Biŋe Qurande buŋo sosowo oi ŋiŋigo goine boburo yabeko quraŋgabi iŋi bobianŋ nobeiŋ ore pega: Oi osebeneŋ Anutuji maŋnoŋuŋ boburoru kadi foriine qaji noreru sembenenoŋunde ore kane noberu botiŋ nobeega eru gogo posiine gokiminde kajeqouŋ enoreru kegbore noreega. ¹⁷ Anuture ŋiŋigo noŋuŋ oi oseru kegboreru Anuture mire so sananŋaru kuririnoŋuŋke fukeru gio fine sosowo bakimiŋ ore jaueru gokimiŋ. Oŋu.

4

Polji gioine igokoine Timotire paio ruaya.

¹ Kiŋ Ofoŋnoŋuŋ Kristo Yesuji fukeru jiŋoke gokimiŋ, me komeru pekimiŋ noŋunde buŋo osoreru mitariku goine noŋuŋ qorumanineo ruaru siŋanŋ nobeiŋ. Nonji Yesu oi eru Anutu yokore jiŋo maio dimaku go mande gio bamiŋgo ore mitiga garego. Oi boyobeiŋgo miku buŋo oi mimipanŋ buŋoji kipende manebe sagaiŋ.

² Iŋi mitiga garego: Goji Biŋe buŋo miku ŋiŋigo manyanŋuŋ bapakare yaberu goigoŋ. Manenimiŋ ore damaninere manebi sagaga me so sagaga, jibu yameŋ keku pakereru buŋo mitaniŋgaru

goigonj. Njigigo seineyanunde ore miyareru bo-tiqotingaru sijnaj bobo buņo miku mande buņo yajiku goigonj. Buņogo maneniminj me so manen-iminj, oi jibu maneku kariere dimaku kadi foriine damanj so qaji yareru goigonj.

³ Nonjij mamanesinde buņo damanj yoo njigigo fianiminj ore qaji yareegobenenjyong, damanj mo wareru fukeme oo mamanesinde buņo mobeine mo egu maneniminj ore useru kajeyanj kebojin-iminj. Buņo furuine furuine maneniminj ore ka-jeyanj joroko njire nj boakonj yobu furu yabebi wareru njigigo buņo oi me oi maneniminde anj maneniminj, ore so qaji yarebi goniminj.

⁴ Onju goku Biņe buņo foriine egu maneniminj ore qaqouma eru kajeyanj kebojiru nemu sainj kosa miegobi, yonjore obe kirieru kaje ruaru maneru goniminj. ⁵ Gogo onju me onju qopieru fukeinj, Timoti go jibu qinj keru sanangaru dimaku eebobogo poretinj sisijnaj eeku goigonj. Sisiri egareniminj, ore joisererenjine maneru kariere osigaru goigonj. Manjapakare (ewanjelis) njire gio buru oi sagaru sosowo ba foreigonj.

⁶ Damanj joroine bapi gubeminj ore embim-binjgabeminj ore onju migo. Nemu gbonj miteņgakiminj ore joma qaku korogo ruaru rigabi jukondunji ropeeya. Ore so nonji gogone Anu-ture eru kisingaru gioine baku gobonj ore gaw-man yonjoni buņone kipebi nakenere dari kesebe-minde damanjne bombengago. Moreņ yo bokebe-minde damanjni bio wareru fukeinggo bembengaru wareme manego.

⁷ Masiri njiji sisiri damanjineo gbinj einjo ore tobiriine sosowo qojugaru giningaru raga, nonji

ore so mamananiṅ kegboreru sisiri kuririineke eforego. Kristo manesiṅ garu miine reṅgabemiṅ ore buṅo miku kipeboṅ, oi so kesonṅaru mugabonṅon, ore jigoiṅe damaṅ so sananṅaru qaku gobon.

⁸ Ofonji mimitari Rauine poretiṅ fukeru gogone osoeru posiine fukeru gobon, ore hendiṅ boteine oi mitari nareme nonde odi nuru pega. Ofonji kirieru wareiṅ damaṅ oo oi nareku ubeneo keme rakako tinabiṅeneke fukebemiṅ. Oi nonṅ akonṅ so nareinṅon, ṅinigo manji jojoko eteru moke fukeiṅ ore odigaegobi, oi yonṅore ubeo onṅakonṅ keme raka eyareiṅ. Onṅu.

Ogopuneji boke nuru siṅsaṅ rabuṅ.

⁹⁻¹⁰ Damaṅ yoo morende eebobo eba eegobi, muraṅne Demas inṅoji maṅine eebobo oo kiperu boke nuru Tesalonaika sitio raya. Ogone Kresens inṅoji Galesia prowinsgo raya. Taitusji Dalme-sia moreṅgo raya. Ore eru go pipa nondeo wareiṅgo yameṅ keigonṅ.* ¹¹ Luk inṅoji inṅoyonṅe akonṅ noke gogobere. Makji kiṅaṅ qa nareiṅ ore kokoine maneru inṅore embimbiṅago. Ore eru Mak ogagaru moko warenimi.* ¹² Ogone Tikikus sorebe Efesus sitio raya.* ¹³ Troas taonṅo goku marikune ṅi tinaine Karpus inṅore pigo bokebon, oi roru wareigonṅ. Onṅakonṅ quraṅ lama sakiineo quraṅgaru poporiṅgabunṅ, nonde lama sakiine oi

* **4:9-10:** Kol 4.14; Flm 24; 2 Kor 8.23; Gal 2.3; Tai 1.4
Kol 4.14; Flm 24; Apo 12.12, 25; 13.13; 15.37-39; Kol 4.10
Apo 20.4; Ef 6.21-22; Kol 4.7-8

* **4:11:**
* **4:12:**

yameŋ keku roigoŋ eru ore ŋadio buk goine oi oŋuakoŋ roru wareigoŋ.*

¹⁴ Aleksander, silwa aeŋ rigaru babakatore ŋi manege, iŋoji sembene fuŋne fuŋne kokoine enareku goya. Ofonji eeboboine osoeru ore so geoine bokirieme paiineo ropeko joiserereŋ maneŋ, oi manego.* ¹⁵ Iŋoji buŋonoŋunde kokoine kiso enoreru goya. Ore eru go oŋuakoŋ iŋore sisinaŋ eku goigoŋ.

¹⁶ Ate fuŋfuŋgaine qoqodure buŋo koro qoru-ineo rua nubi buŋone tife mibe moji mo so wareru noŋ kitiŋ nuru miyayoŋ, ogopune sosowo yoŋoji totieru boke nubun. Anutuji agibu-ranyaŋuŋ ore tife paiyaŋuŋgo egu ruaiŋ ore oŋga wosigo.

¹⁷ Yoŋoji boke nubunyoŋ, Ofonji bapi nuya. Nonji Biŋe buŋo miku ŋiŋigo maŋ bapakare yaberu gio oi sosowo ba forebemiŋ ore eru basanaŋ nuya. Kantri sosowo yoŋoji Biŋe oi manenimiŋ ore maneru bapi nuru laion rigaŋine yoŋore mi sironyaŋuŋgo egu boke nunimiŋ ore sabareku miyaŋuŋgone bomuku nuko wakiboŋ.

¹⁸ Ofonji sembene fuŋne fuŋne egu banarenimiŋ ore bomuku nuko soine Sombun qorumaŋinere maŋgo paibe ropebemiŋ. Ofonde tina jijiki miteŋ gagobeneŋ damaŋ tatariine tomiri kuririineke fukeru pe ropeiŋ. Buŋo oi foriine.

Momojo buŋo tatariine

¹⁹ Go nonde momojo Prisila eru ŋoeline Akwila yokore eru Onesiforusre garikiŋpu yoŋore minde

* **4:13:** Apo 20.6 * **4:14:** 1 Tim 1.20; Kiki 62.12; Rom 2.6

maneinebi.* ²⁰ Ogone Erastus bokebe Korint sitio goga. Trofimus oi Miletus sitio bokebe jibe bame pega.* ²¹ Ore eru kueyoiko damaŋ so wareme rumanineo yoo nondeo wareiŋgo yameŋ keigoŋ. Ni tinayaŋuŋ Yubulus, Pudens, Linus, Klodia eru maŋkekerisie ogopunoŋuŋ sosowo yoŋoji momo-joŋaŋuŋ miku ruabi goreo foga.

²² O Timoti, Ofonji qoqotigo mifiagaru goke dimaine.

Anuture yaunmoririji ŋoŋoke peine. Oŋu.

* **4:19:** Apo 18.2; 2 Tim 1.16-17 * **4:20:** Apo 19.22; Rom 16.23; Apo 20.4; 21.29

**Manʒekerisiere Bine Quran Jojofa Gariine
The New Testament in the Mape Language of Papua
New Guinea**

Nupela Testamen long tokples Mape long Niugini

Copyright © 2008 The Bible Society of Papua New Guinea

Language: Mape

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

PDF generated using Haiola and XeLaTeX on 21 Feb 2024 from source files dated 31 Aug 2023

8278cae8-b7ff-5cfb-8118-7ef9b429ffd9